

共同經課 - 1

撒母耳記上十七章三十二節~四十九節

32 大衛kā掃羅講，人m免爲tiòh hit人來失膽，你ê奴僕beh去kap hit-ê腓利士人交戰。33 掃羅對大衛講，你boē能去抵敵chit-ê腓利士人，kap伊交戰；因爲你ê年歲iáu-kú少，伊tùi少年就學習戰士。34 大衛kā掃羅講，你ê奴僕kā老父顧羊ê時，有獅á是熊來，tùi羊群中咬羊á去；35 我就jip伊，phah伊，救羊á出伊ê嘴；伊起來beh kāng我，我就khiú伊ê嘴下斗，phah死伊。36 你ê奴僕bat phah死獅kap熊；chit-ê無受割禮ê腓利士人，也beh親像in ê一隻；因爲伊藐視永活上帝ê軍隊。37 大衛koh講，耶和華救我脫離獅ê爪kap熊ê爪，伊也beh救我脫離chit-ê腓利士人ê手。掃羅kā大衛講，你去ah，耶和華beh kap你tī-teh。38 掃羅就用伊ê軍服hō大衛穿，用銅ê頭盔hō伊戴，koh hō伊穿戰甲。39 大衛用刀hā tī軍服，試行看cheh(=一下)；因爲m-bat穿tiòh。大衛kā掃羅講，穿chiah-ê我行boē去，因爲m-bat穿tiòh。40 大衛就thng起來；伊手kiáh枋á，koh tī山坑á揀五塊光滑ê石卵，hē tī袋á，就是顧羊ê人所帶ê囊；手thèh hì"石ê索á；就行oá hit-ê腓利士人。41 Hit-ê腓利士人也ná行oá大衛，koā"牌ê行tī伊ê頭前。42 Hit-ê腓利士人kiáh起來看，看見大衛，就看輕伊；因爲伊少歲，色緻赤，面貌好看。43 Hit-ê腓利士人kā大衛講，我kiám是狗mah，你chiah kiáh枋á來我chia？腓利士人就kí家已ê上帝，咒詛大衛。44 Hit-ê腓利士人koh kā大衛講，你來我chia，我beh用你ê肉hō空中ê飛鳥kap田野ê野獸。45 大衛對hit-ê腓利士人講，你來oá近我，是用刀，用鎗，用擲；我來oá近你，是用萬軍耶和華ê名，以色列軍隊ê上帝，就是你所藐視ê。46 今á日耶和華beh將你交tī我ê手，我beh phah死你，thài你ê頭殼；今á日我beh將腓利士軍兵ê身屍，hō空中ê飛鳥，地上ê野獸；hō普天下ê人lóng知以色列有上帝；47 koh hō chiah-ê kui群ê人知耶和華救人，m是用刀，也m是用鎗；因爲交戰ê事在tī耶和華，伊beh將lín交tī阮ê手。48 Hit-ê腓利士人起來，進前近oá beh chih大衛。大衛也趕緊走去，ng軍隊beh chih腓利士人。49 大衛伸手入袋á內，thèh一塊石á出來，用索hì"去，射tiòh腓利士人ê頭額，石á沉入頭額；伊就倒落去，面仆tī地裡。

共同經課 - 2

詩篇九篇九節~二十節

9 耶和華koh beh做受壓迫ê人ê高台，Tī患難ê時ê高台。10 Bat你ê名ê人beh oá靠你；因爲，耶和華，你bē-bat棄sak chhê你ê人。11 Tiòh o-ló khia起錫安ê耶和華，將伊所行ê報揚tī眾百姓ê中間。12 因爲hit-ê查辦命案ê記得in；無boē記得困苦人ê哀求。13 耶和華ah，求你憐憫我；你是tùi死門救我起來ê，Tiòh鑑察hiah-ê怨恨我ê人所hō我tú-tiòh ê苦難。14 Thang hō我講起你一切ê好名聲；我beh tī錫安城ê門，爲tiòh你ê救恩來歡喜。15 列邦陷落tī in所開ê陷坑；In ê腳纏tī in暗靜設ê羅網。16 耶和華已經顯明家己，伊已經行審判；Phái"人hō家己ê手所做ê纏tiòh。[Hi-kai-un, Sè-láh] 17 Phái"人beh歸tī陰府，Boē記得上帝ê列邦亦beh án-ni。18 因爲sòng-hiong人的確無永遠hō上帝boē記得，困苦ê人ê ng望，的確boē永永無去。19 耶和華ah，求你起來，m-thang容允人khah贏；願列邦tī你ê面前受審判。20 耶和華ah，求你hō in驚惶；願列邦知家己不過是人nā-tiā"。[Sè-láh]

共同經課 - 3

哥林多後書六章一節~十三節

1 阮kap主同tiòh磨ê亦勸lín m-thang空空受上帝ê恩。2(因爲伊講，Tī得tiòh接納ê時，我有聽你，Tī拯救ê日我有幫贊你；你看，chit-tiáp是受接納ê時，你看，chit-tiáp是拯救ê日)3 阮一概無塞礙人，免得chit-ê職份犯嫌；4 就是凡事證明本身合tī做上帝ê差用，是tī choē-choē吞忍、患難、5 欠缺、困迫、受phah、關監、擾亂、tiòh磨、無困、無食、6 廉潔、知識、寬容、仁慈、聖神ê感化、無假ê疼、7 真理ê道、上帝ê權能，用義ê 戰器tī左右，8 無論榮光凌辱，phái"名聲好名聲；親像騙人ê，其實是誠實ê；9 親像人m知，其實choē-choē人知；親像beh死，其實是活；親像受責罰，其實無致到死；10 親像煩惱，其實常常快樂；親像sòng-hiong，其實hō choē-choē人富；親像無有，其實是無m有。11 哥林多人ah，阮ng lín嘴開開，心闊闊。12 m是tùi阮hō lín 狹toèh，是tī lín ê心家己狹toèh。13 Ta" lín tiòh學chit-ê款，家己開闊來報答阮；我講án-ni，是親像對家己ê細kiá"來講。

共同經課 - 4

馬可福音四章三十五節~四十一節

35 Hit日已經暗，伊kā學生講，咱過來去hit-pêng岸。36 In離開眾人，chhoā耶穌就án-ni落船，kap in sa"-kap去；iáu有別隻船kap伊去。37 報頭風大起，湧潑入船，致到船teh-beh滿。38 但是伊tī船尾倒tī枕頭teh困；學生叫伊醒，kā伊講，先生，阮beh無命，你無要緊mah？39 伊就醒，責備風，kā海講，Tiòh靜靜。風就soah，也大平定。40 伊就kā in講，Lín啥事hiah驚？lín iáu-bē有信mah？41 In就大驚，sa"-kap講，chit-ê是甚麼人，連風kap海lóng順伊？